

IZVJEŠTAJ O RADNOJ POSJETI DAMIRA GUTIĆA, MINISTRA SOCIJALNOG STARANJA, BRIGE O PORODICI I DEMOGRAFIJE, MINISTARSTVU CIVILNIH POSLOVA BOSNE I HERCEGOVINE, U SARAJEVU, 19. MARTA 2025. GODINE

Ministar socijalnog staranja, brige o porodici i demografije Crne Gore, Damir Gutić, boravio je 19. marta 2025. godine u radnoj posjeti Ministarstvu civilnih poslova Bosne i Hercegovine u Sarajevu, na poziv ministarke civilnih poslova, Dubravke Bošnjak.

Ova posjeta realizovana je u duhu dugogodišnje dobre saradnje između Crne Gore i Bosne i Hercegovine, koje dijele snažne bilateralne odnose i zajedničku posvećenost unapređenju socijalne politike i zaštite građana. Poseban značaj posjete ogleda se u potpisivanju **Sporazuma između Crne Gore i Bosne i Hercegovine o socijalnom osiguranju, kao i Administrativnog sporazuma za sprovođenje Sporazuma između Crne Gore i Bosne i Hercegovine o socijalnom osiguranju**, čime se osigurava bolja zaštita prava građana u oblastima penzijskog i invalidskog osiguranja, zdravstvenog osiguranja, te osiguranja za slučaj nezaposlenosti.

Ovim sporazumima omogućava se efikasnija koordinacija politika socijalnog osiguranja, čime će građani obje zemlje ostvariti lakši pristup pravima koja im pripadaju. Takođe, uspostavljaju se trajni kanali saradnje između nadležnih institucija, što će omogućiti bržu i efikasniju implementaciju dogovorenih mjera.

Ciljevi posjete

- Potpisivanje Sporazuma između Crne Gore i Bosne i Hercegovine o socijalnom osiguranju i Administrativnog sporazuma za sprovođenje Sporazuma između Crne Gore i Bosne i Hercegovine o socijalnom osiguranju.
- Unapređenje zaštite prava građana u oblastima penzijskog i invalidskog osiguranja, zdravstvenog osiguranja te osiguranja za slučaj nezaposlenosti.
- Jačanje postojeće saradnje između dvije zemlje kroz razmjenu iskustava i najboljih praksi u oblasti socijalne politike.
- Definisanje narednih koraka za implementaciju potpisanih sporazuma, uključujući tehničke i pravne aspekte, kao i uspostavljanje trajnih kanala komunikacije za praćenje realizacije dogovorenih aktivnosti.

Značaj posjete

- Produblјivanje bilateralnih odnosa kroz institucionalizaciju saradnje u oblasti socijalnog osiguranja i socijalne zaštite.
- Jačanje regionalne stabilnosti i evropske perspektive, kroz saradnju koja je usklađena sa evropskim standardima i praksama u oblasti socijalne politike.
- Otvaranje novih mogućnosti za zajedničke projekte i buduću saradnju, s ciljem postizanja održivih i dugoročnih rješenja u korist građana obje zemlje.
- Unapređenje efikasnosti institucija, kroz bolju koordinaciju politika i bržu implementaciju rješenja u oblasti socijalne zaštite.

Ova posjeta predstavlja značajan korak naprijed u jačanju odnosa između Crne Gore i Bosne i Hercegovine i postavlja temelj za dalju saradnju u oblastima ključnim za dobrobit građana obje države.